

Хальмг Базрт



С О В Е Т С К Й О С Н Т О Г Т Л Г Ъ Н

1917 джилин Октябрьск революцин дольган Аадрхн балгъснд 1918 джилин январь сард кўрч ирв. Аадрхнд гражданск дән эклв. Кесг удандан ноолдад Аадрхнә кōдлмшчнр диилв. Аадрхнәс белогвардейцнриг, цагъан-хазгудин анъгсиг кōбдж гаргъв. Тедн зулхларн Хальмг Базрар дāvрдж зулцхав. Хальмг Базрин баячуд бас бултцхав. Хальмг Базрт тер заамд йосн уга болв.

Январь сарин чилгчәр үгәтә хальмгуд цуглард, олна хург кегъад—„Хальмг Базрин хальмг келн амтн Советск йоснд тўшнāvдн, тер йосна заасн-заксн тоотинь эркән уга кўцәнāvдн“,—гидж шиидвр гаргъв. Эн шиидвриг Аадрхнә ревлюционн комитетд Бадашев Тюрбя болн Шеинов Коя хойр кўргв.

Дарунь, Аадрхнә губернск салдсмудин болн кўч-кōлсчнрин депутатнрин Советин съездт депутатнр сунъгъдж илгәх зōвтә болад, хойрдад хальмгудин олна хург хурагдв. Февраль сарин шинәр Аадрхнә губернъд болн Хальмг теетт Советск йосн тогтасн мартшго хургин делегатнрт, трусовск кōдлмшчнрин дружинд орлцдж Аадрхнә дāанд дāалдсн, Бадашев Санъгъдж-Гәрәг, сургъудин кōгшин багш Петкиев Церниг болн Манджиев Больдәг сунъгъдж илгәгдв.

Эн хуртт Хошуд нутгин кесг анъг-шугъусаснь делегатнр ирцхāv—Бадмаев О., Актюбеев, нань чигн улс. Болджах хургиг болн кўч-кōлсчн-

рин гартан шин авсн йос хархар тер делегатнрла Ностаев, Босхмджиев Джаку, Дахаев, Манджиев, Чимидов, Бурмбаев болн нань чигн олн хальмгин багъчуд ирцхāv.

Тер цагт гартан бууга, зер-зевтә, Октябрьск диилвриг харсдж йовсн хальмгин багъчуд хōнән нерән дуудулдж, гражданск дāәнә зальд орлцдж амән огсн Босхмджиев Джакуг, Актюбеевиг, Кекеев Эльдәг, нань чигн кесг багъчудиг олн кўч-кōлсчнр мартл уга, одгә цаг кўртл амндан келцхәнә.

Энүнә даруднь орсмудин, хальмгудин, манъгъдмудин цуг олна хург хурагъад, Хальмг Базрин Волостной Совет сунъгъгдв. Советин ахлачд Картошин, ахлачин дарукд Гайфутдинов, сегләтрт Мунянов Му-Хар сунъгъгдв.

Иигдж олн кўч-кōлсчнрин, орсмудин, хальмгудин болн манъгъдмудин зўрки негддж, ўр, инъг-амрг, танъгърг болцхалж, кōдлмшчнрин, крестъянмудин диилдж авсн йосиг харсдг болсн.

1918 джилин намр. Революцин диилвриг хольвлхар дотрин контрреволюц болн газадин ордудин интервенц чанъгърв. Тер замла арвдгч аәрмин командовань намаг Нуурин худг гидг газур, Комендантск управлень бўрдәтхә гидж йовулв.

Кўчр гилг тўрү, зовлнъгта цагла эн даалгъвриг кўцәх зōвтә болвв. Северн-Кавказур, Манцын голур, фронтур кергтә тоот снаряжень, материал, хотхол йовулх, фронтас ирджәх

шавта красноармейцнриг эмнлгънә халхар, хот-хол, дулан бāар белдх кергтә болв. Увлин замла медпункт, амтн ордгер, халун хот кедг кухня бўрдәгъад, тер Нуурин худгт бāасн нег цōн улс-комендантск кōдлчнр арвдгч аәрмин командованә даалгъвриг цаглянь кўцәгъад, революцин диилврмудиг харсцхав.

Эн нег онц-бичкн тас газрт чигн революцин суцин цокджахнь медгдсн юмн. Тер шидрин бāарн амтс Нуурин худгиг „Красна худг“ гидж нерәдцхәдг болв. Иигдж нерәддг учрнь тиим онц тасрха газрт, тиим ахрхн цагин зуур болв чигн революцин алдр диилврмудин туг өргдж, Октябрьн диилвриг харслжахан медудсн йовдл.

„Ахир-дўур хальмгуд“ гисн тууджлгдсн үгәр эклсн хальмг келн амтиг дуудсн Владимир Ильич Ленинә дуудвр ахир орс амтн болн В.И. Ленин хальмг келн амтнә тускар эцк мет сāагъинь хāалгъиг ил тодрхагъар медүллә.

1920 джил Хальмг автономн танъгъч бўрләгдлә. Тер д Хальмг танъгъчин кўцәгч комитетин членд би сунъгъгдв. Эн джиләс экләд тōвшўн бāах цаг ирлә, болв эн тōвшўн бāалгънд цааранднь дотр-дундин бандс—Андрианов, Сычев Менгетиев, Тегусов, нань чигн толгъачнрта ик харшлган хальдала. Танъгъчин милицин лач йовад, эн бандсла кўцәгидг ноолда кедж, хошуд нутгт йовсн Тегусовин бандиг дāалдж чилāvдн.

МУНЯНОВ Му-Хар.
1919-ч джиләс авн КПСС-нн член.